

Ishaaq^(a.s) Kī Paidaish

Taurait : K̄hilqat 17:15-26; 21:2, 4, 6, 8

[Ibraaheem^(a.s) kī beewī, Saarah, ab tak Saraayī kahalaatī theen. To] Allaah taa'alā ne Ibraaheem^(a.s) se kahā, "Maiñ tumhaarī beewī Saraayī ko bhī ek nayā naam duñgā. Uskā nayā naam Saarah hogā,⁽¹⁵⁾ maiñ usko barkat duñgā aur usse tumheñ ek aulaad haasil hogī." Wo bahut logoñ kī maañ hogī aur bahut sī saltanatoñ ke baadshaah usī se paidā hoñge."⁽¹⁶⁾ Allaah taa'alā kā shukr adā karne ke liye Ibraaheem^(a.s) ne apnā sar neeche zameen par jhukaayā. Ibraaheem^(a.s) hañse aur apne āp se kahā, "Kyā ek ādmī jo sau saal kā hai aur Saraayī jo nabbe saal kī hai, ek bacche ko paidā kar sakte haiñ?"⁽¹⁷⁾ To Ibraaheem^(a.s) ne Allaah taa'alā se kahā, "Ismaaeel par bhī to āpkī nazre karam hogī."⁽¹⁸⁾ Allaah taa'alā ne kahā, "Yaqeenan tumhaarī beewī Saarah se ek beṭā paidā hogā jiskā naam Ishaaq hogā. Maiñ us se ek ahad karuñgā jo hameshā ke liye rahegā, har ek ke liye jo uske baad āeñge."⁽¹⁹⁾ Aur jo tum Ismaaeel ke baare me kah rahe ho maine usko bhī sun liyā hai. Maiñ usko bhī barkat duñgā aur uskī bhī bahut saarī aulaadeñ hoñgī. Maiñ usko azeem banā duñgā. Wo baarah shahazaadoñ kā baap hogā aur maiñ uske k̄haandaan ko ek azeem qaum banā duñgā.⁽²⁰⁾ Merā ahad Ishaaq se purā hogā. Tumhaarī beewī agle saal isī mausam me ek laḍke ko paidā karegī."⁽²¹⁾ Jab Allaah taa'alā kī Ibraaheem^(a.s) se baat purī huī to bashaarat k̄hatm huī.⁽²²⁾

Ibraaheem^(a.s) ne Allaah taa'alā ke hukm ke mutaabiq apne beṭe Ismaaeel^(a.s) kā, saare laḍkoñ kā jo unke ghar me paidā hue the, aur wo saare naukar jinko unhone paion se k̄hareedā thā, sabkī k̄hatnā karaayī.⁽²³⁾ Jab Ibraaheem^(a.s) kī k̄hatnā huī to unkī umr ninyaanawe saal kī thī,⁽²⁴⁾ aur unke beṭe kī umr terah saal kī thī.⁽²⁵⁾ Ibraaheem^(a.s) aur unke beṭe kī k̄hatnā ek hī din huī thī.⁽²⁶⁾

21:2,4,6,8

Sarah buḍhaape me haamilā huī aur unhone Ibraaheem^(a.s) ke liye ek laḍke ko paidā kiyā. Wo us waqt hī haamilā huī jo waqt Allaah taa'alā ne unke liye tay kiyā thā.⁽²⁾ Allaah taa'alā ke hukm ke mutaabiq Ibraaheem^(a.s) ne apne beṭe Ishaaq^(a.s) kī k̄hatnā kī jab wo āṭh din ke the.⁽⁴⁾ Saarah ne kahā, "Allaah taa'alā ne mujhe hañsā diyā aur jo koī bhī is baat ko sunegā wo bhī hañsegā."⁽⁶⁾ Bacchā baḍā huā aur uskā ḡhudh ḡhuṭayā gayā aur usī din Ibraaheem^(a.s) ne ek bahut shaandaar daawat dī.⁽⁸⁾